

## COMUNICÂT STAMPE

### ISCRIZIONS VIERTIS PAL CORS DE BOTTEGA ERRANTE CU LA POIE DE ARLEF

## SCOLTE & CONTE, PRIN LABORATORI DI SCRITURE CREATIVE PAR FURLAN

Udin, ai 2 di Setembar - La associazion culturâl Bottega Errante, cu la poie de ARLeF, Agenzie Regionâl pe Lenghe Furlane e cu la colaborazion di Radio Onde Furlane, e inmanee il prin laboratori di scriture narrative par furlan.

Il cors si inviarà ai 17 di Otubar dutis lis joibis par 8 incuintris (des 20.30 aes 22.30) e si tignarà te sede di Radio Onde Furlane. Al sarà un laboratori pratic là che i corsiscj a podaran meti jù tescj naratîfs, contis e storiis par furlan.

Lis lezions a saran curadis di insegnants che a son tra i rapresentants principâi de leterature furlane. Maurizio Mattiuzza al sviluparà i siei incuintris a tacâ de nassite di une narazion, dal procès creatîf di une storie aes diviersis formis dal contâ: contis, scriture teatrâl, reportage, poesie narrative. Dut chest simpri cu la lenghe tant che riferiment: cuâl furlan par cuâl gjenar? Cemût sielzi il lessic e la forme e rindiju materie par contâ?

Dilunc dai doi incuintris curâts di Walter Tomada si proponarà une sorte di radiografie de scriture par furlan intai ultins 150 agns cun riferiment particolâr aes clâfs di leture che si cjatin intal mont naratîf in lenghe furlane.

Intai apontaments dedicâts al romanç, Franco Marchetta al lavorarà cui corsiscj sul gjenar romanç e sul rapuart tra cheste forme di scriture e la lenghe cun chê di stiçâ un procès creatîf fondât su la relazion tra mont di vuê, mont furlan e mont european. Une atenzion particolâr e sarà dedicate ae Rêt tant che imprest e spazi alternatîf di narazion.

Radio Onde Furlane i darà po acet a di un altri apontament cui microfons vierts là che a saran letis lis contis metudis jù dai corsiscj, là che i curadôrs e i corsiscj a comentaran la esperience e a saran presentâts al public i risultâts de iniziative.

Lis iscrizions si vierzin il prin di Setembar e al è timp par notâsi fin ai 15 di Otubar. La cuote par cjapâ part e je di 50 euros. Dutis lis informazions e i modui par iscrivisi si ju cjate sui sîts internet [www.bottegaerrante.it](http://www.bottegaerrante.it) e [www.ondefurlane.eu](http://www.ondefurlane.eu). Par altris informazions: [info@bottegaerrante.it](mailto:info@bottegaerrante.it) o 340 2445710.